

Ina unda da simpatia per La Quotidiana

Tschintg iniziants lantscheschan in appel per la gasetta dal di

CUN GIUSEP NAY HA DISCURRÌ
CLAUDIA CADRUVI / ANR

■ **Mintga Rumantsch e mintga Rumantscha sa a partir dad oz signar cun ses num en l'Internet l'appel Pro Quotidiana. Pussaivel è quai grazia a tschintg prominents iniziants che sa mettan en ils stadals e vulan ch'il pievel possa mussar sia simpatia e ch'ins cuntinueschia cun la gasetta dal di.** L'idea deriva da l'anterieur schurnalst dal Beobachter *Hans Caprez*. Da la partida en era *Maria Cadruvi*, *Gion-Andri Cantieni* e *Bernard Catomas*. Il tschintgavel è l'anterieur derchader federal *Giusep Nay* che ha gist anc surpiglià la rolla dal pledader da medias.

La responsabladad principala è uss tar il chantun


Suenter 20 onns less la Samedia charl d'edir la Quotidiana nun ch'i dettia ina sprezza finanziaria substanziala. Tge vul Voss appel?

Giusep Nay: Hans Caprez ha gi l'idea ch'ins sto uss mussar ch'ils Rumantschs vulan La Quotidiana. I dova in appel era per quellas persunas ch'èn londervi da preparar in concept co ch'i duai ir vivanant cun la gasetta.

Esi immediat stà cler en tge furma che Vus vulais far l'appel?

Nus avain ponderà quant concret che nus lessan formular la chausa. Uss essan nus sa restrenschids sin quatter appels. Sco emprim esprimin nus in engraziament e la solidaritad cun il schefredactur *Martin Cabalzar*. Sco segund appellain nus a la Samedia ch'ella portia responsabladad e tanschia maun per ina soluziun transitorica fin ch'ins chatta ina nova via a lunga vista.

Ha la relaschada da Martin Cabalzar dà il stausch per quest appel?



Il Rumantschs duain appellar da far guttas cun chau per segirar la gasetta dal di, di Giusep Nay sco pledader dals iniziants. FOTO T. DEFLIA

Per mai persunalmain bain. Jau chatt ch'in tal segn da solidaritad è necessari per betg laschar el – cun tants meritis suenter trent'onns lavur per la pressa rumantscha – tranter sutgas e bauns. Nus engraziain era al cussegel federal e schain che nus prendain el per il pled: En sia resposta sin l'interpellaziun da cusseglier naziunal *Martin Candinas* ha el exprimì sia prontadad da sa gidar sch'il chantun e la Lia rumantscha fan ses pensums. Quai munta terzo ch'il chantun e la Lia rumantscha ston uss vairamain prestar buna lavur e guardar da metter in bun concept sin via. E quarto duai la Rumantschia, ch'è la finala sezza responsabla per ina gasetta quotidiana, far quest appel.

Tge muntada ha l'existenza da La Quotidiana stampada?

Ina gasetta stampada è ozendi, malgrà tut las purschidas online, vivanant in

organ impurtant per la lingua. Jau hai gist gi sin telefon in pur da Surrein, en sazez pervi d'in'otra chausa. El ha ditg: «Sche nus n'avain betg pli La Quotidiana na savain nus gnanc pli tge che la vischnanca fa e tge che marscha en autras vischnancas. Da quai na rapporta uschiglio nagin.» Qua vesan ins l'impurtanza da quest organ che publitescha ultra da novitads regularmain contribuziuns pli approfondidas, litteratura e columnas rumantschas che mantegnan dal remitent er il stgazi da plets. Quai fa schizunt bain a quels che scrivan las columnas (el sto rir). Jau scriv bunamain 90 perschiert per tudestg, lura èsi magari bun da puspè exercitar l'adiever dal rumantsch.

Vus scrivais sez columnas e brevs da lecturs. Senza La Quotidiana svanis questa plattforma che blers Rumantschs nizegian gugent per s'exprimer.

Gist quai è ina vart figt interessanta da la gasetta. Jau legel regularmain las columnas e contribuziuns da lecturs. Là vegnan tractadas tematicas actualas da giuvnas rumantschas u dad umens pli passads. Uschia porscha la gasetta in maletg dal viver e dal pensar dals Rumantschs.

La gasetta porscha in maletg da noss viver e pensar

Tge lessas cuntanscher cun l'appel Pro Quotidiana?

Nus lain propri exprimer che la responsabladad principala è uss tar il chantun. Il cussegel federal ha empermess ses sus-

tegn e la Lia rumantscha vul sa chapescha era ina soluziun. Ma ils daners da la confederaziun dependan dal chantun. Lez sto era esser pront da contribuir sia part. Uschia è uss cuntanz la regenza grischuna dumandada da vairamain procurar che avunda meds stettian a disposiziun per ina gasetta quotidiana per Rumantschas e Rumantschs.

Igl è agnain da smirvegliar: Si da Berna è svelto vegni in signal positiv da sustegn. Ma en l'agen chantun han ils Rumantschs savens difficultads da chattar uddia.

Exact. Sch'ins sa co ch'il cussegel federal respunda uschiglio interpellaziuns, è quai (redaziun: la resposta sin l'interpellaziun Candinas) ina da las raras repostas che tunan uschè positiv.

Ins sto mussar ch'ils Rumantschs vulan La Quotidiana

Duess La Quotidiana cumparair vivanant en furma stampada?

En noss appel vesain nus sper la gasetta stampada era ina furma online. Nus n'essan betg illusionists che crain che la gasetta stampada tradiziunala sappia adina vegnir mantegnida sco fin qua. I sto dar ina maschaida da la furma stampada ed online sco tut las autras.

Duess la gasetta cumparair mintga di?

Gea, e sch'ins fa ella era online, na cumpara ella betg mo tschintg dis, mabain vegn actualisada era la sonda e la dumengia. Ma nus na lessan betg entrar memia figt en detagls, quai n'è betg nossa chausa. L'intent da l'appel è vairamain ch'ils Rumantschs e las Rumantschas dettian in ferm signal ch'i stoppia vegnir fatg guttas cun chau.

Dapli sin www.proquotidiana.ch

Indesch Rumantschins termaglian en la canorta

La purschida a Turitg è probabel l'emprima da quest gener en la Bassa

DA CLAUDIA CADRUVI / ANR

■ **Mintga gliendesdi avra la canorta rumantscha sias portas per ils pitschens rumantschs da Turitg. Ils indesch plazz èn stads occupads ils ultims trais mais. Ils geniturs beneventassan sche la canorta schlargiass sia purschida e fiss averta dus dis.** Avant biabain dus onns han tschintg babs gi l'idea. Per propri organisar tut hai lura duvrà in onn. Ils babs han fundà l'uniun Canorta rumantscha Turitg sco purtadra. L'uniun ha motivà anc autras famiglias da tarmetter ils uffants en la canorta. Ins ha rimnà daners. E cun la fundaziun GFZ han ins la finala chattà in'organisaziun cun experientscha che ha surpiglià il manaschi. Uss exista la canorta dapli passa in onn. Igl è probabel l'emprima ch'ins ha mess en pe en la Bassa.

Avrir dus dis?

«Per il mument avain nus cuntanschi in'occupaziun cumplaina», di Remo Pfister, il president da l'uniun. El è dentant precaut e fa attent ch'i dat savens midadas en ina canorta, per exempel sch'ina famiglia mida domicil u

sch'ils uffants pli vegls van a scolina. Uschia vegnan l'avust puspè liber dus plaz. L'uniun saja cuntenta sch'i dettia novas annunzias. Fin uss hajan ins avert la canorta mo il gliendesdi. «La finamira è da schlargiar la purschida, sche nus surveggin persunal qualifitgà

per dapli dis», di Pfister. L'uniun haja fatg ina pitschna retschertga tar ils geniturs e commembers ed il resun saja stà positiv. Fin uss lavurian trais educaturas rumantschas per la canorta. Per perscher in segund di duvrass in a quarta persuna.

GFZ tschertga educatura

La fundaziun GFZ – pli baud il «Gemeinnütziger Frauenverein Zürich» – s'engascha gia dapi passa tschient onns per famiglias ed uffants e maina da preschent 13 canortas per passa 1600 uffants. La canorta rumantscha ha chattà albiert tar il GFZ en il Zeltweg gist davos la staziun Stadelhofen. Fin uss èn s'occupadas trais educaturas: duas discurran sursilvan ed ina ladin. Uss datti ina midada ed il GFZ ha scrit ora ina plazza d'almain 20 perschiert per in'educatura rumantscha che po tenor inserat ev. anc lavurar dapli en autras partiziuns dal GFZ.

In di da famiglia ils 27 d'avust

La fin d'avust organisascha l'uniun in di da famiglia tant per ils agens commembers sco era per interessents che lessan savair dapli da la canorta. Ils 27 d'avust a partir da las 11.00 s'entaupan las famiglias en il GZ Schindlergut, nua ch'i dat la chaschun da termagliar ora en il parc u era endadens.

Dapli informaziuns: www.canortarumantscha.ch



«Cucu!» Far termagls en ina stgatta da chartuna plascha sa chapescha era als uffants da la canorta rumantscha. FOTO C. CADRUVI